

46 Vita S. Franc. de Paula

veritatem. Congruentiùs nos putamus, ut pro Sanctis de Assisio intelligat Scriptor Sanctam Mariam Angelorum dictam, quæ Assisii jam à S. Francisci temporibus colebatur, & Sanctum ipsum Franciscum de Assisio nuncupatum. Re vera ut ex aliis documentis constat, ad S. Mariam de Angelis, & S. Franciscum de Assisio invisendum, colendumque Franciscus noster cum Parentibus suis Assisium se contulit. Nulla S. Claræ mentio in itinere illo conficiendo, nulla in persolvendo voto, quod Parentes ejus fecerant.

En Testis sextus Processus Consentini Joannes Antonachus in interrogatione septima: *Conduxitque eos peregrinatum secum ad S. Franciscum de Assisio, & S. Mariam Angelorum.* Quæ & antea dixerat super tertio, loquens de Vienna Matre: *Ipsamque cum dicto Jacobo Marito suo, & ipso Fratre Francisco, peregrinatum fuisse ad S. Franciscum de Assisio, & S. Mariam Angelorum.* Relatio quoque Simonetæ authenticum est testimonium: *Vocatis Parentibus, eos, ut se ad Ecclesiam S. Francisci de Assisio, & Sanctæ Mariæ de Angelis, devotionis causa, ducere vellent, enixè rogavit.* Non imus autem inficias, ut quam maximè etiam Sanctam Virginem Claram Franciscus noster coluerit, & veneratus Assisii fuerit; sed quæ scribimus eò diriguntur, ut pro Sanctis de Assisio, quos non præter historiæ veritatem Scriptor noster posuit, non Franciscus & Clara legendi sint, sed potius Beata Maria Angelorum, & S. Franciscus de Assisio, quos præcipuè Franciscus noster, pro voti solutione cum Genitoribus suis Assisium venit, ut veneraretur.

VI. TOTO TEMPORE VITAE IPSIUS) Ex verbis hisce reformari forsitan poterit argumentum contra illud, quod apud nos fuit semper habitum exploratum; quodque etiam